



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

Marcelo football asaya nungi anisungzüker

Hamas aser Israel na tepuoker pongubenbuba melentepogo

VOL. XXII ISSUE NO. 116 (ADOK 116)

DIMAPUR

AMUNGNÜ (SUNDAY)

TSÜKLAI (FEBRUARY) 09, 2025

₹ 5.00

Küm 27 lir külen BJP-i Delhi madak yimsü asütsü

New Delhi, February 8, 2025 (Agencies): Küm 27 lir külen BJP-i Delhi nung sorkar yimsü asütsü tashi nguogo. Taküm assembly election nung BJP-i Arvind Kejriwal aser Manish Sisodia na tamakok ngudakja Aam Aadmi Party (AAP) sorkar atsüngdokogo.

Züngsem 70 agia akümba Delhi Assembly nung BJP-i menden 48 nung takok nguteta half-way mark 36 adenogo. 2020 Assembly election nung BJP-i menden 10-a menguteti liasü saka takümbo parnok kijai sorkar akümtsü tashi nguogo.

Delhi nung taoba assembly election ana tashi nung AAP-i menden teimtiba nung takok nguteta liasü saka tan election nunbo parnok menden 22 nung dang takok angu. Ajisüaka, Congress-ibo assembly election asemben atongtepa menden ka nung dang takok mengutet.

Taküm election nung BJP-i vote share 45.56% angu aser AAP-i 43.57% ngutetogo. Ajisüaka Congress-ibo 6.34% votes dang ngua menden ka nung danga takok mangu.

Taküm election nung BJP-i AAP tongtipang lennir aika tamakok ngudaktsüogo. New Delhi constituency nung BJP candidate Parvesh Verma-i AAP national convenor Arvind Kejriwal madak takok angu. 2013 nungi Kejriwal-i iba menden nung takok ngua aru saka taküm election nung votes 4,089 agi pai tamakok ngua liasü.

Taoba minister Kailash Gahlot-i ita ishika tejakdang AAP toktsür BJP nung aden aser pai Bijwasan constituency nungi votes 11,276 agi takok angu.

Maneni, AAP toktsür tawa BJP nung adenba Kartar Singh Tanwar-ia Chhatarpur menden nungi AAP candidate Brahm Singh Tanwar madak takok angu.

Assembly elections agitsü lia Anil Jha aser Pravesh Ratn nati AAP toktsür BJP nung aden aser tenaprongi takok nguogo.

Kejriwal apuba sülen Atishi-i Chief Minister menden melenzük aser Kalkaji menden nung lai BJP candidate Ramesh Bidhuri madak

takok angu. Ajisüaka, Health Minister Saurabh Bharadwaj-ibo Greater Kailash nung BJP candidate Shikha Roy tsüngdang votes 3,188 agi tamakok angu.

"Delhi nung AAP-i lenmang meyanglu, tzü atsüngdenba khuret adokdaksü, jana benden aser mopung kanga menentsü" ta PM Modi-i ashi.

"Tesüiba sorkartemio urbanization ya khuret ka, tayongzükba ka ama züngshi. Parnoki yimitem ya parnok nija rongsen bendendak kümdaktsü. Ajisüaka urbanization ya maangka ka ta nibo amanger. Iba ya sensaker aser tangar memenepertem tashi itdaksütsü wadang ka lir" ta PM Modi-i takok anguba sülen ashi.

AAP sorkar atsüngdoktsü ta meteta Kejriwal-i video message ka nung nübortemi oshidang agütsüba agizüker ta lemsatepogo.

AAP-i asadangtsü aser "constructive opposition" ka ama shilem agitsü atema temulung agütsütsü. Onok tashi atema politics meinyaker saka onoki iba ya nübortem tenzükba sabang ka ama züngshir, ta Kejriwal-i ashi. Congress-i Delhi Assembly elections asemben atongtepa menden ka nung danga takok mengutet.

"Onoki Delhi oshidang ajemalua agizüker. Delhi nung Congress züngsemtemi bendanga agütsüba aser onok pusema voters dang kanga pelaba metetdaksür. Iba rara ya Delhi renloksü aser Delhi nung alirtem temeten atema lir. Mopung menenba, jenjang atuba aser ochimashi anema rara manentsü" ta Rahul Gandhi-i ashi.

Osangbenertemi Arvind Kejriwal tamakok ngudaktsüba BJP candidate Parvesh Verma dang pa Delhi nung Chief Minister inyaksü asü ta asüngdangdang "ni tamangba nisung ka lir. Anungji ni kanga mepelar aser kanga mejashir. Party high command-i kechi shidir ni pelashishia agizüksü" ta pai langzü.

Delhi Assembly elections ya February 5 nü agi aser vote enoktsür ajak agi 60.54% liasü.

Meira Paibi temi CM Biren mapa nungi anentsü akhanger

Imphal, February 8, 2025 (Agencies): Manipur nung Meira-Paibi nunger noklang aika adenshir Chief Minister N Biren Singh mapa nungi anentsü takhangba agütsüba den village volunteers (VVs) apuba anema lungkak aitha sentong ka agiogo.

Village volunteers (VVs)-i Manipur litsü kümzüka ayutsü atema parnok akokba tashi inyaka arur ta Meira Paibi temi ashi.

International Airport, Imphal anasa aliba Tulihal Kolapur

Community Hall nung iba sentong ayongzüka agi.

Manipur Chief Minister N Biren Singh mapa nungi tangsa anentsüla aser tepuokdak yua aliba village volunteers chioktsüla. Maneni Manipur nungi Armed Forces (Special Power) Act 1958 agientsüla ta parnok takhangba agütsü.

Malom Tulihal - Mamang Leikai, Mayai Leikai, aser Maning Leikai nungi Joint Meira Paibi temi iba sentong ayongzüka agi.

WC NNPGs Convener aser Working Conveners tasentem shim



(Abelen nungi) NSCN/GPRN (U) president MB Neokpao, NSCN/GPRN (Reformation) president Wangtin Konyak, NSCN/ GPRN (K) Ato Kilonser Isak Sumi, NSCN (R) Ato Kilonser P Tikhak Naga aser NSCN/GPRN (U) Ato Kilonser Alezo Venuh nunger Hotel Saramati nung osangbener senden nung agiba noksa angur. (Dimapur, February 8)

Dimapur, February 8, 2025 (TYO): Naga yimten telok tenet agi tentetba Working Committee, Naga National Political Groups (WC NNPGs)-i India sorkar den jembishinütsü atema züngsem asem shimogo.

Honibarnü Hotel Saramati nung sentong ka nung NSCN/ GPRN (U) president MB Neokpao-i WC NNPGs-i convener aser P Tikhak Naga o Isak Sumi nati Working conveners inyaksü shimogo.

Taoba nung N. Kitovi-i NNPG Convenor ama November 17, 2017 nü India sorkar den Agreed Position nung sign sütepa liasü. Ajisüaka, NSCN

(Unification)-i Kitovi mapa nungi anentsüba ajanga convenor aser working convenors ana tasen shimtsüsa aküm.

NNPG-i India sorkar den Indo Naga ken o latettsü atema inyaka arur ta NSCN/GPRN (Reformation) president Wangtin Konyak-i osangbener den jembidang ashi.

"NNPGs-i India sorkar den Agreed Position nung sign süogo aser iba ya mapa akümtsü atema onoki tebilemtsü abener. Onok ajaki bendanga agütsür aser külemi olemtep metembang tashi inyaka aotsü" ta Wangtin-i ashi.

"Onok sasep nung mangatettep ken o tem alitsü

akok saka itemji angatetteptsü koka lir. Naga tebilemtsü atema Agreed Position nung amendaker nükjidong tejangja ka dang lir" ta Working Committee, NNPG Convenor Isak Sumi-ia ashi.

"Working Committee-i India sorkar nem roadmap agütsüogo aser ibaji onoki mulunga agizüktepogo. Tang iba ken o nung India sorkar ket nung lir" ta NSCN/GPRN (U) Ato Kilonser Alezo Venuh-ia ashi.

Iba sentong nung Naga political groups aser Civil Society Organisations, Naga Students Federation aser Dimapur Naga Students Union nungi teshimtet nübotem aden.

Tanü Nagaland ya onoki bilemba Nagaland masü : S.C.Jamir



Akhoya nunger Walunir L. Sanen taküm otsü kaket sayaba mapang par medemer Wb. S C Jamir, Wb. K. Imo Aier aser kaket zülur Tiala Imchen nungertem den kinungertem noksa nung angur. (Aoyimti, Dimapur, Feb.08,2025).

Dimapur, Feb.08 (TYO) : Naga nunger melongjemteti nüchiso bushir telok metsü trok kümer aliba tensa mapang ya kodanga memenateptetsüsa jaksaba glass tejaksa amai lir, ibai onoki pongmangba aser bilemba Nagaland masü, ibai asenoki asenoksasa raksaba aser yanglutetba tensa tia nung asenok alir ta taoba angh aser taoba Nagaland Chief minister Wb.S.C.Jamir-i tesasaba olen ka metetdaksü.

Pai iba o ya tanü Küptoknü (honibar) nü yangi Youth Oasis Centre, Dimapur nung Walunir

L.Sanen Ao taküm otsü kaket sayaba sentong nung jembidang metetdaksü. Walunir L.Sanen Ao otsü kaket ya Tiala Imcheni züluba kakat tajung aser tongtibang ka lir. Wb.L Sanen Ao ya Akhoya nunger akhi British mapang Dobashi Lendinokdang'er jabaso Nagaland Civil Service nung tulur ka liasü aser school nung par medemertem rongnung S.C.Jamir aser Rev.K.Imo nungertem liasü.

" Akhi onok mapangbo kaketreju nung pei tenüng züludang tatsüba agi mamshi saka tsüraburi jatsüba tenüng

rangbensa amshia aru aser mapa inyakba ajak nung hau süra hau, nunga süra nunga ta ochi nung indangindanga nokdak," ta Wb.S.C.Jamirisa ashi.

Paisa tanü Naga nunger loktiliba nung atalokba indang tesasaba ka indang ashidang, tanü Naga nungertemi Naga nunger rangben longjemtsü indangbo mejembir, saka pei kin rongnung mesüra kin anasemka longjemtsü indang dang jembir, aser kati ka aitsütepa jembiba dak alaka tang aser tarutsü indang jembir mali kümogo ta paisa metetdaksü.

(Maneni tapak 2 nung...)

Little Friends Montessori & Kindergarten Teachers Training Institute ki tasen kati belenokba sentong agi



Little Friends Montessori & Kindergarten Teachers Training Institute ki tasen kati belenokba sentong nung adenertem külemi tanokba noksa.

Mokokchung, Tsüklai/February 08(TYO): Little Friends Montessori & Kindergarten Teachers Training Institute ki tasen kati belenokba sentong ka Tzüsapang Ward Mokokchung nung Woodland Nursing Home anasa tanu Ao Kaketshir Mungdang Tir Sb.Lanutoshi Aier Tetushi Tejaoker süa meraketa kaogo.

Iba sentong nung Ao Kaketshir Mungdang Tir Sb.Lanutoshi Aier-i jembidang Montessori ya tanur ka asoshi taküm jenjang yangluba mapang lir, Iba nungya taküm lia aotsü asoshi ajak tabensa angazüker, anungji iba school ya nübur asoshi kanga dang tongtipang lirta ashi.

AKM Tir-isa tanu putu kibongtem nung tanurtemi mapa kecha meinyaker kilir nem dang inyakdaksür, alima renloka aoba

ajanga mobile agi tanurtem kanga dang raksadagi, anungji Montessori nungi tenzüka tanur ajak nem shisaliok den külemi tsüngkang medema mapa inyaksü angazükdakjangta Little Friends Montessori kibur aser tesayurtem ayongzüka ashi.

Sentong nungsa tarur pela agizükba aser Little Friends Montessori indang tats ü agi Administrator Wb.Lima Lemtur-i jembidang pa aser Kinüngtsü Wt.Aienla tenati 2010 küm nungi par aliba Longphayimsen nung tanur tilatem anidena sayu tenzük aser 2017 küm Little Friends Montessori ta tenüng jateta tila tanurtem sayuba den ano Kindergarten Teachers asoshi training agüja arur. Tesayurtemji class 12 aser tema azüngertem nem Diploma

Course agütsü aser Class 10 azünger nem Certificate Course agütsürta metetdaksü.

Iba Little Friends Montessori & Kindergarten Teachers Training Institute, ki tasen meshiteta Tsüsapang Baptist Arogo Pastor Rev.W.Supong ajanga sarasadem aser Mokokchung Baptist Arogo Pastor Rev.Imti-i Tsüngremer lenisüba jazüka sarasadem sentong tenzük iba den Mokokchung Village Council, Chairman Wb.L.Mapu Longkumer-i tepela o tatsüka jembir tatem nung Tsüngrem nem tenungsang agüja Union Church Fazl Ali College Campus Pastor Rev.Lima Lemtur-i sarasadem aser Wt.Toshisangla Asst.Professor Fazl Ali College ketdangsüba nung sentong agia liasü.

Churachandpur-Bishnupur nung telungpur teseap ngutetogo

Imphal, Tsüklai/February 8 (Agencies): Security force temi meita aoba mapang Manipur kübok Churachandpur aser Bishnupur district yongtsü nung telungpur teseap ka ngutetogo aser prangbong, injang, bomb aser tanga hadirtem aika ngutetogo.

Osang tejangja angazükba sülen Bishnupur police commandos, Nambol police, 33 Assam Rifle aser 8th Battalion CRPF nung longjemer Nambol police station kübok Aigejang

tenemtsüing meita oa liasü.

Meita aoba mapang parnoki telungpur teseap ka ngutet aser iba den prangbong injang aser hadir aika ngutetogo.

Ajisüaka nisung ka danga mapu kechiyong security forces tem maru tsüngda telungpurtem ajak jenshir liasü.

Sepaitem ngutetba hadirtem rongnung, .303 rifle ka, bolt action rifle ka, single-barrel guns ana, .22 pistol ka den magazine ka, 9mm pistol ka den

magazine, and grenade pongu, Chinese hand grenade ka, 40mm highly explosive lathode grenades pezü, long-range modified mortar shell ka, 2-inch mortar shells ana den carrier, SLR empty cases 10, tear gas grenades ana, stun grenade ka, smoke grenade ka, smoke shells pongu, wood piercing shell ka, anti-riot rubber bullets pezü, chilli grenades ana aser five tear smoke shells pongu densema liasü.

NPP lenir aser züngsemtem Congress party nung denogo



Dimapur, Tsüklai/February 8 (TYO): Minority Department - State tir Sudesh Bhagat aser General Secretary (Org), NPYF Jaser Meru nati anir NPP lenirtem telok ka aser züngsem 13 tanü Congress Bhavan, Dimapur nung Congress party nung officially denogo.

Iba sentong nung L Chuba Yimchunger, NPCC General Secretary In charge - Dimapur, Javed Sarwar, Chairman, Minority Department, NPCC, Kutoho Chishi, President,

Dimapur DCC aser PCC züngsem aser secretary tem aser Congress züngsemtemi shilem agia liasü.

Party nung züngsem tasentem agizüksü atema Kumjimong, General Secretary, Dimapur DCC lenisüba nung sentong tatsüka agi.

Sentong nung Javed Sarwar-i lokti pela agizükba o jembi aser pai züngsemtem tasentem pelashishia agizükba den parnoki taoba mapang mapa tajung inyakbatem atema

tenüngsang agüja liasü. Paisa, parnok dang Nagaland nung Congress party tashi itshitsü atema inyaksü asoshi ajungshia liasü.

Sentong nungsa L Chuba Yimchunger, Sudesh Bhagat, Jaser Meru, aser Hiketo Shohe nungeri o tatsütsü jembi liasü.

Hiketo Shohe-i, telemtetba shitak agiba atema züngsem tasentem nem tenüngsang agütsü aser ajak longjemer Congress party tashi idaktsütsü tenangzüka agüja liasü.

KVYO-i gari senzügenpong indang metetdaksü

Dimapur, Tsüklai/February 8 (TYO): Gari tsükokba lendong balala nungi jenboa alitsü aser gari senzügenpong tali tajungba achaayangtsü atema Kohima Village Council-i tetuyuba tasen kar agütsüogo, aser iba ajanga Mission Compound nungi Ura Academy tashi lenmang dak kongshitsü.

Mission Compound nungi Ura Academy tashi aoba lenmang ya One-Way route ama dang amshitsü. Gari ajak tetuyuba agütsür aliba lenmang nung dang senzütsüla. Gari nongtepba tajemba kümdaktsütsü aser garitem kecha tetsükdaktsü makai senzükdaktsütsü nükjidong nung iba jenjang agiogo.

Iba den bendenloksema Kohima Village Gate nungi Mission Compound tashi lenmang nung gari anentsü memelatsü. Tetsükdaktsü adokdaksüba agintsü aser senzügenpongertem aser

garitem teküzmzüka kübok toktsütsü atema iba jenjang agiogo. Iba tesem nung anena aliba garitem dang senchi achitsü aser nüngdak süra pua bener aotsü.

Iba dak sendakba nung Kohima Village Youth Organisation-i, iba tesem nung alirtem, senzügenpongertem aser tesemdangertem dang gari senzügenpongtsü atema tetuyuba tasen agütsür aliba sülen tashi anga anidaktsü mepeshia metetdaksüogo.

Parnokisa, iba temelenshi ajanga kongshitsü alirtem nem iba osang agütsütsü mepeshia metetdaksüogo. Iba temelenshi ajanga minprongba nungi jenboa alitsü atema osang agütsütsü kanga tongtibang.

Maneni iba tetuyuba dak sendakba nung ken o jangjashinüba kar danga lira Kohima Village Youth Organisation office den tongteprateptsü metetdaksüogo.

Tanü Nagaland ya onoki... (Tapak 1 nungi...)

Joko, asenok ya alima aso 21 buba nung alir, anungji taoba putu nung atalokba indangang jembi mekazüi tarutsü indang bilema tanü Naga yimten telatetba ka dangi arutsü atema Naga nungertem government nem khuret agüja rongshitsüla ta paisa ashi.

Tanü iba sentong nung Rev.Dr.L.Kari Longchari sarasadema kakat sayatsü aser kakat zülur Tiala Imcheni kakat nung zülua aliba otsü kar telok den lemsatep. Iba kasa sentong nung Tir Yimiyim yimozülur K.Temjen Jamir, Rev.Yanglu Imsong aser Akhoya nung yimsüsür tebu tedi K.Mangyang Jamir nungertemia tepela aser tajungshi o jembi liasü. Iba sentong nung menden School

Education department nung Asstt. Director Wb.Takowati Jamir liasü. Iba sentong nungsa kinungertem rongnungi tepela o Wt. Asenla Tamsü aser Wb.Lima Imsong nati jembi. Iba sentong tenzüka Aoyimti Baptist Arogo nung sannüker Rev.Tamsü Jamiri sarasadem aser Rev.Kilang Jamiri sarasadema sentong tembang.

Iba kakat nung Nagaland lanu asüdag tesem balala nung lepteptsüngtep atalokba aser Chuchuyimlang nung Natwar Thakkar arua Gandhi Ashram amenokba aser Ao lima nung 1970s nung tanela asentenshi tulu adokba otsütem indang zülua lir. Iba kakat aginertem mobile number 70858 41337 / 98629 16418 ajanga tongtepratepangma.

TMC pur Meghalaya council election nung metokteptsü

Shillong, Tsüklai/February 8 (Agencies): Trinamool Congress (TMC)-i Meghalaya nung taruba Khasi Hills Autonomous District Council aser Jaintia Hills Autonomous District Council election nung shilem magitsü atema telemtetba agiogo.

District Council ana atema election ya February 21 nü agitsü renema lir.

State assembly nung TMC pur ya opposition party tulutiba süaka parnoki tang iba telemtetba ya agiogo. Meghalaya Assembly nung TMC MLA pongu lir.

Opposition lenir aser taoba mapang Chief Minister Mukul Sangma-i ashiba agi, tensa kanga junga asadanga sülen TMC-i iba telemtetba ya agiogo.

"Election ajak nung tokteptsü ya nüngdak madoker ta bilemer aser talisa district council elections nung shilem agitsü nüngdak mali, kechiyong onok

tang party aser talisa grassroots jenjang tashi taitba kümdaktsütsü asoshi inyakyim lepa reprangshia inyakdar," ta Sangma-i ashi.

Garo Hills nung kanga tashi ita amenoker liaka Khasi Hills aser Jaintia Hills nung TMC pur tashi ita amenoktsü mekoki arudar, aser ibayongji parnoki tang iba telemtetba ya agiogo.

Kasa mapang nung Chief Minister Conrad K Sangma-i aniba National People's Party (NPP) pur iba council anaprongla nung kanga tashi ita amenoka lir.

Tanga party tongtibangtem rongnung NPP, United Democratic Party (UDP), Voice of the People Party (VPP), aser Bharatiya Janata Party (BJP) nung taruba election nung tokteptsü atema renemdar.

NPP, UDP, aser BJP nung ajak ya state nung sorkar kümteter aliba coalition nung shilem ka lir.

BJP-i Parvesh Delhi CM shimtsüa akok



New Delhi, Tsüklai/February 08 (Agencies): Delhi assembly election nung New Delhi assembly constituency nung BJP candidate, Pavesh Sahib Singh Verma-i taoba mapang Delhi Chief Minister Arvind Kejriwal madak takok nguogo.

Kasa constituency nung Congress candidate Sandeep Dikshit-ia toktepa liasü.

BJP-i Chief Minister menden atema Verma shimtsüa akok. Verma ya 'Jaat' kin nungi lir, anungji BJP yimtenren nung pa ya kanga tongtibang.

Takok anguba sülen Parvesh

Verma-i X ajanga "Jai Shri Ram," ta lemsatep.

Verma ya taoba mapang Delhi Chief Minister aser BJP lenir, Sahib Singh Verma'er jabaso lir. Verma teko Azad Singh-a tamalen North Delhi Municipal Corporation nung Mayor inyaka liasü aser 2013 küm assembly elections nung BJP ticket nung Mundka menden nungi toktepa liasü.

Election osang sangdongba sülen Verma'er jala ana - Trisha aser Sanidhi nati voters dang pelaba lemsatepa, "New Delhi nung alirtemi nungita yariba

atema pelar. Yazü jembia yimsüsür ka nem Delhi nung alirtemi tanaben maongka magütsütsü," ta metetdaksü.

Tenatisa, "Takok angutsü, ta onoki meteta liasü. Onoki mapang tetemsü dang ata-a liasü. Tangbo Delhi nung alirtemi tiyazü nem takok mengudaksü," ta metetdaksü.

Verna teyi, Rachna Sindhu-i, "Teyi ka ama ni kanga pelar. Constituency nung tetsürtem-a pelar, kechiyong parnoki Parvesh dak tamang katetogo," ta ashi.

Laisa AAP sorkar aija, "Kibok sema nüboyimtsü nüngdakba tesemtem nung onoki inyaka liasü. Delhi nung tetsürtem kümzüka mali, anungji bus nung angati senzüdaksüba agi kechi asütsü. Tetsürtemi BJP dak teimla angu," ta ashi.

Assembly menden 70 aliba Delhi assembly nung BJP-i menden 48 tashi nung takok angu, AAP-i tanüngba menden 22 nung takok angu aser Congress-i menden kata mangu.

AAP aser Cong longjem asübo BJP-i takok mengula: Sanjay Raut

Mumbai, February 08 (Agencies): Delhi assembly election nung BJP-i AAP madak takok anguba sülen Honibarnü Shiv Sena (UBT) MP, Sanjay Raut-i, Delhi nung Congress-AAP loktep asübo parnoki BJP tamakok ngudaksür lila, ta ashi.

Maharashtra nung voters list nung ochimashi liasü, ta shia Raut-i, Delhi election nunga "Maharashtra inyakyim" benshia liasü, ta metetdaksü.

"AAP aser Congress nati tesendaktep yanglu asübo jungla. Party anapronglai peipei sasep nung dang BJP den toktep. Parnoki longjemer toktep asübo BJP-i atangji tamakok ngur lila. Asenoki iba nungyagi lesson agitsüla," ta pai ashi.

Osangbenertem den jembidang Raut-i, Maharashtra nung assembly election mapang nung voters lakh 39 bendenloka liasü, ta tai tongloksü.

"Item votes ji Bihar-i maotsü

aser kar Delhi-i ao. Delhi nunga Maharashtra inyakyim benshia liasü. Election Commission-i mangu ama toktsü," ta Shiv Sena (UBT) lenirisa ashi.

Küm 26 lir Delhi nung BJP-i sorkar tentettsü. Delhi nung BJP-i menden 48 angu aser AAP-i menden 22 nung dang takok angu.

Taoba mapang Delhi deputy chief minister Manish Sisodia-i BJP candidate Tarvinder Singh matsüngdang tamakok angu aser AAP tongti lenir, Arvind Kejriwal-i BJP candidate, Parvesh Verma matsüngdang tamakok nguogo.

Raut-isa, Delhi nung mapa inyaksü atema Aam Aadmi Party dang memela aser Delhi LG (Lieutenant General)-i tashi ajak amshia liasü, ta aitsü.

"Tongtibang lenirtem ajak jail nung ayu. Tamakok anguba kulitem rongnung ibaji densema liasü," ta paisa metetdaksü.

Parliament senden anogo 100 bosa asütsü atema bill benok



Parliamentary calendar nunga inoktsü atema pai iba bill ji benok.

Pai X ajanga, "Mezüngbuba Lok Sabha nung Parliament senden anogo 135 liasü, ajisüaka tangbo anogo 55 dang kümogo," ta metetdaksü.

O'Brien ya Rajya Sabha nung TMC nungi Parliamentary Party lenir lir.

Paisa, "Parliament senden anogo tajemba agia anogo 100 bosa asütsü aser Parliamentary calendar nung inoktsü atema Private Member's Bill ka benokogo," ta metetdaksü.

Hokolbarnü Rajya Sabha nung Constitution (Amendment) Bill, 2024 (amendment of article 85) benokdang pai, democracy akhümket wazüka ayutsüji tongtibang, ta ashi.

Kasa senden nung Rashtriya Janata Dal (RJD) nungi Manoj Kumar Jha-ia Parliament (Productivity Enhancement) Bill, 2024 benoka küm shia

Parliament senden anogoji tajemba agia anogo 120 bosa asütsü metetdaksü.

PRS Legislative Research-i renemba data ajanga ashiba agi, mezüngbuba Lok Sabha (küm 5) nung senden 677 amen aser ibaji küm shia anogo 135 senden amenba den kasa lir. Tanabuba Lok Sabha nung senden 581 ben amen aser ibaji küm shia anogo 116 senden amenba den kasa lir.

10buba Lok Sabha nungbo senden 423 dang amen aser ibaji küm shia anogo 84 senden amenba den kasa lir. Atal Bihari Vajpayee-i aniba sorkar mapang (13buba Lok Sabha) senden 356 ben amen aser ibaji küm shia anogo 71 dang senden amenba den kasa.

16buba Lok Sabha nung senden 331 dang amen aser 17buba Lok Sabha nunga senden anogo 274 dang amen.

Coronavirus wara mapang 17buba Lok Sabha nung 2020 küm nungbo anogo 33 dang senden mena liasü.



February 08, 2025 nü Delhi assembly election nung BJP-i takok anguba sülen New Delhi nung aliba BJP office nung BJP pusemertem benjungtepba noksa nung angur.

Ita ana tsüngda Bangladesh nung Hindu nunger 76 ben amak

New Delhi, February 08 (Agencies): India sorkari Bangladesh nung Hindu nungertem kanga amakba atema tebilemtsü akaba lemsatepogo.

Lok Sabha senden nung Minister of State for External Affairs, Kirti Vardhan Singh-i, Bangladesh nung November 26, 2024 nungi January 25, 2025 tsüngda Hindu nungertem anema inyakba tatalokba 76 liasü, ta metetdaksü.

Lok Sabha nung tasüngdangba ka langzüdang Minister-i, yaküm August ita nungi tenzüka Bangladesh nung Hindu nungertem amakdang Hindu nunger 24 süogo aser Hindu nunger tekülem ki 152 raksatsüogo, ta metetdaksü.

Item tatalokba atema India sorkari temaba ketdangsertem dang Bangladesh nung Hindu nunger densema minorities kümzüksü atema inyakang ta shiogo, ta pai metetdaksü.

Yaküm Bangladesh nung Sheikh Hasina-i aniba sorkar chirepba sülen Bangladesh nung Hindu nungertem amak

tenzüka liasü.

Aibelenertem nem temerenshi agütsütsü atema Bangladesh nung ketdangsertemi kecha meinyaker, ta India-i aitsür.

Yaküm December 9 nü Bangladesh yimtiba, Dhaka semdangba mapang nung India Foreign Secretary-i, Bangladesh nung Hindu nungertem aser nütsüng ajema alirtem kümzüksü atema inyaksü India-i imlar ta metetdakja liasü, ta Singh-i ashi.

"Bangladesh yimtiba, Dhaka nung High Commission of India-i maneni iba tensa mita reprangdar," ta paisa metetdaksü.

Bangladesh nung ketdangsertem den senden amenba sülen December 10 nü Bangladeshi sorkari, linük nung minorities amakba tatalokba 88 dak sendakba nung nisung 70 puogo, ta metetdakja liasü. Bangladesh nung ketdangsertemisa minorities anema inyakba tatalokba ajak senteper 1,254 jangjaogo.



February 08, 2025 nü Union Finance Minister, Nirmala Sitharaman aser Reserve Bank of India Governor, Sanjay Malhotra na 613buba Central Board of Directors (CBD) senden nung adentsü arudang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, FEBRUARY (TSÜKLAI) 09, 2025

Tsüngrem akümtsüburtem

Tsüngremi ashiba ochi otem rongnung tongtibang kaji shirnoki Tsüngrem akümtsübur Paia parnokjiang akümtsübur. Asenok ya alima nung liaka Tsüngrem yimli nung alir, anungji shirnoki Tsüngrem meimer Pai tali meimtsü saka shirnoki Pa meimeimer aser mezüngshir, Pai parnokji Pa yimli nung mezüngoktsü. Iba kasa oji asenoki 1 Samuel 2:30 nung yamai shia angutsü, "Shirnoki ni akümtsübur, nia parnok akümtsübutü aser shirnoki ni mezüngmeshidir, nia parnok mezüngshitsü." Anungji, Tsüngremi asen meimtsü-memeimtsü mesüra akümtsübutü asü metsübutü, ibaji asenok dak keta lir. Asenoki Tsüngrem tsüngdang koma liden yamaji Paia asenok den alitsü. Eli ya küm aika Israel nunger madak putir liasü. Pai Tsüngremer ozüngtem jungjunga meteta liasü aser pa ama kati Tsüngrem tsüngdang koda meshiteta alitsüla, aji pai meteta liasü. Ajisüaka, pai Tsüngrem tsüngdang koma alitsü tim yamaji melitet. Pai Tsüngrem tsüngdang par kibong meshiteta meytet aser Tsüngrem akümtsübutü melen par jabasotemang aküm tetsübuta ama aküm. Akhidang, putirji kanga dang temeshi, Tsüngrem den jembirtem, anungji tashi tulu liasü. Putir jagi dang nübortem rongnung yimsü asü aser obendang, anungji parnokji Tsüngrem akümtsübuta Pa tsüngdang meshiteta alitsübaji kanga nüngdak liasü. Ajisüaka, Eli'er kibong asoshi dang masü saka Israel nung ajak atema tia makatsü kaji, Eli'er jabaso anapronglai Tsüngrem aküm metsübu. Parnok temeshi ozüng süngden ayudak temeshi tenla kidang alir, saka parnoki memeshiba chiyongtsü achi aser nüktapangta benshi. Par jabasotemi temeshidak menenja temenen mapa inyakbatemji Eli putiri meteta dang liasü, saka pai parnok mesongtem aser mazüoktet saka parnok sünütsü südaktsü. Aji oda, Eli putiri par jabaso arüja azüoktsü melen, parnok nem temeshi ozüng süngden apudaktsür tongpangi odaktsü. Eli putir jabaso anati temenen mapa inyakbaji ajaki meteta liasü, saka shingaia parnok anema ola madoktet, anungji metetsümonga Israel nunger taküm aika tsükchir ket nung sama. Ashiko, Eli putir aser par jabasotem jagi parnoki Tsüngrem akümmetsübuta, parnok temeshi kidang alir aser temeshi süngden parnok ket nung aliba jagi Tsüngremi parnok taküm aser kibong kümzüksü ta bilem südi. Ajisüaka, tenla kidang aliba agi nisung ka temeshi makümer ta Tsüngremi Eli nem angatetdaktsü. Aji oda, ozüng süngden apur senzüba agi nisung ka temeshi akümtsü makok. Ibayongji, ozüng süngden apur tongpangi aor Eli putir'er jabaso ana tsükchirtemi tepset aser ozüng süngden dena rakzükdaktsü. Israel nunger asoshi ibaji tongpang makokba dang nungi maksü tuluba liasü. Iba osangji angashir Eli putir menden nungi tsüka tekong sükdanger asüba otsü asenoki 1 Samuel nung angur. Kibongbo temeshiba nung aküm saka tanurtem mazüoktet. Kibo meshitet saka takümbo memeshitet. Kidang Laishibabo lir teti ibaji yipten kolak nung yur mejanger, saka tazünga mazünger aser Tsüngrem o nung shia aliba amaia malir ta asüba asen kibongji akhidang Eli'er kibong mesüka lir. Eli'er kibong ya asenok ajak asoshi tansütsü kibong ka lir. Asenoki tenla kidangbo Tsüngrem tenüng asanger saka asenok mapa inyakdakbo Tsüngrem amadoker. Tangar tamanger tajungtem den medemdangbo asenoka tamanger tajung amai alir saka kodang asenok kija liden asenok takümüji tangar asoshi temetsüdaktsü long amai akümer. Tsüngrem nungi takok aginüa asenoki Pa nüng sanga tashi meshir saka takok anguba sülen asenoki asensasa angu amai bilemer. Tsüngremi iba ama temulungjang aser libaliruji maginür. Tsüngremi asenok nem moatsüba kimong, ki aser kibong ajakji temeshi lir, anungji asenoka temeshi lidaktsüner. Iba amaji ka melitetra, Tsüngremi asenok daka tangar ajak tan asütsüsa inyaktsü. Tsüngremi asenok akümtsübuter, aji koda maongka tulu. Ajisüaka, ibaji asenoki Pa akümtsübu nungang Paia asenok akümtsübutü ta tanü iba Tsüngrem o yagi asenok dang nenshia ashir. Ibaji asenok asoshi ano taochi ola ka asütsü.

OLEMSABANG

AJAK PEI NÜNGTEM CHICHIBA NUNG LIDI

~ Molungkimong Literature Board

Ao Senden Literature Board aser ABAM Literature Committee - item Aor pangdak tematiba Luden aser züngsem den yimtsüng level Molungkimong Literature Board (Molungkimong Yimden, Arogo aser Senso-i shimba Luden) medemdangtsü khenyongi makok. Saka Naga tenem nung, 1870s mapang nungi Khristan yimsü aser mezüng Arogo tenzüka otsüji Molungkimong nung atalok asünung ozü yimkong nung atalokba, ozü-i ngua aser meteta aliba Arogo otsü; iba den semloka 1970s nungi ozü research nungi nguteta shisatetba (Research documentation, analysis and synthesis) ji Naga nunger aser alima den lemsateptsü ozü khuret. Aser 'Naga tenem nung mezüng Khristan yimsü Molungkimong nung December 22, 1872 nung tenzüka' ta asüba ya Modern Naga History tamendakdak aser research ajak nung tongtipangtiba footnote lir. Molungkimong Literature Board shinga dena tsükchia mali saka Aor/Naga nunger puti otsü aser Aor/Naga nunger Arogo otsü nükmen shidak ayutsüji tim asünung, tazünger aika laka doker alitsüa akok, saka yamala telangzüba ocet ya kanga dang nungnanga mapangshi-a zülutsüsa akumer.

Tir Yimym nung Ocet ka (P. Renthly Jamir, 'Na-a Liang Tangar-a Lidakjang' 31 Jan., - Feb., 2) nung teim masüba o aika zülusema angur aser tesüiba nung nisung aikati Arogo otsü nung sendakba ken-o zülusaba aser jembisaba züngshia/angashia lir. Anungji nüburtem den terasa o tenüngdaktsü ajiteta temetetsü o kar lemsateptsüsa akümer. Molungkimong-i shinga danga 'na teli' ta shia mali saka, Ajak pei nüngtem chichiba nung lidi. ABAM Temzüng (2016) kakat nung Jeli O nung "American Baptist Foreign Mission ajanga mezüng Ao Naga Baptist Arogo 22nd December 1872, Molungkimong nung Dr. E.W. Clark-i tenzüka" ta tanü ABAM tamendakdak aliba ya ozü Molungkimong asoshi Tsüngremi Pa sentong atalokdakja semloktsüba sobutsü aser iba maongka ya ozü dak malang ako, saka, Tsüngrem nungi anguba sobutsü aser ayak tematiba lir. Aji, Aor/Naga nunger Arogo tem asoshi Tebuti-a ta asütsü tamaitü/ayang tematiba. Anungji Aor/Naga nunger Arogo ajak Tebuti sobutsü ya shingai-a mawashitsüla. Aor Arogotem ajak asoshi Tebuti ka dang asünung 'ANAREP IMPUR' ta asütsü madoker.

1897 küm Molungyimsen nung par apok chiyunga ABAM tentet, anungji ABAM nung par metendaktsüi aritoktsübaji tim masü ta bilema zülua angur ('Na-a Liang Tangar-a Lidakjang' 31 Jan., - Feb., 2). ABAM temzüng ozüng raksa-a par sünütsü asüyongbo oda yujang ta jembiba agi majungtsü. ABAM Shiti (No. AB03A32/2019-20/87 Dated Impur the 9th April 2020) nung ABAM Temzüng (Revised 2016) aser ABAM Nükla 2030 (2016) Jeli O nung ajemdaker yamai zülusema lir: "ABAM tenoktaktak aser telemtetba ama meliteter den ABAM-i kecha shilem magitsü." Aser ABAM Rungdak Inti Mungdang June 4, 2024 nung Molungyimsen dang court case withdraw asütsü mepishitsü lemtet aser "iba temepishiba magizüktetra ABAMi lemteta aliba dak ajemdaker amalitep makatsü (SLT/2020-07). Yamaji ABAMi telemtetba agia inyaka arudar. Iba dak alaka ABAM nung 'metendaktsüi aridoktsü' jembiba aser inyakba otsü mali.

Dr. Clark ji Cowboy ama liasü ta ashiba nung tali jembiloka aotsü menüngdak. Dr. Clark ket nung soarkar-i agütsüba prangbong pungo liasü; ka bo terpungo ben tokuba prangbong liasü (Laishir Mongchen, p. 85-86). Soarkar-i Molung anüktsü prangbong teperi bener Danton aser Hudhun na yok. Anogo shia among nung mitsa yanglur mendaktsü, aser taru taor ajak nok-nü sarutenasa yur yimdaki atokdaktsü (Laishir Mongchen, p.68). "Paonungji Clark tenük malentep. Prangbong amer nokdak. Ayatrem nungsa parnok apusoa aru" (Laishir Mongchen, p.67). Clark libaliruji yamaji liasü. History of Mokokchung (p.83) nung zülua aliba ji shidak. Aser ajita alitsüsa ji iba mapang asen lima tensa nungji nüngdak asü süti ta angateter.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Asen akümüli mapang Kibubai tenyaba wadang renemtsü



Tawa alima tesem balala nungi Arogo lenirtem Dallas nung adenshia senden aliba mapang sarasademdang tangokba noksa nung angur.

February 08, 2025: Tawa Texas nung Khristan lenirtem senden mena alima nung Arogo, Khristai tenyaba wadang aser alima tesem ajaklen Khrista osangtajung proktsü atema shisa lemsatepogo, ta osang ka ajanga metetdaksü.

Linük balala aser denomination balala nungi lenirtem Texas kübok Dallas yimti nung adenshia alima tesem ajaklen Khrista osangtajung proktsü atema Tanela Temeshii jembiba onük nung shisa lemsatepa liasü.

Osangbener den jembidang Global Church Network tentetsang, Dr. James Davis-i, "Onoki mission inyakbaji shilem asemilir. Longjemba, ayongdenba aser renemba lir," ta ashi.

"Khristan lenirtemi Kibubai tenyaba wadang tuluba renemtsü atema Khrista temang nung longjemba nung yaritsü atema inyaker. Iba ya wadang renemtsü atema lir. Mapang talangka Arogo ka ama onoki, kenü anogobo onoki Kibubai tenyaba wadang renemtsü ta jembir, aser aji inyaktsüji tang mapang ya lir. Anungji onoki longjemmer, ayongdener aser renemtsü atema inyaker," ta Davis-i metetdaksü.

Kibubai tenyaba wadangji kodang renemtsü?, ta asüngdangba langzüdang Dr. Davis-i, "Iba ya asenok taküm aliba mapang nungsa renemtsüa akok. Mapang ana nung lir.

Lenla aika nung maparen tatembanglen kati arudar. Mezüngbuba nung tesendaktep kanga junga kümogo. Tesendaktep tetezü, Khrista nung temang ka südaksür ajak den Khrista osangtajung lemsateptsü atema longjemmer inyakba lir. Ibayongji onoki longjemba ta jembir," ta metetdaksü.

"Tanabubaji ayongdenba lir; ayongdenba aser oshi balala nung Laishiba meyipzükb. Oshi balala nung Laishiba rangben (Tasen Lai & Tejen Lai) oshi ajak nung meyipzükmatsü atema ilonga inyakdar. Alima puti otsü nung Khrista dangi nisung jenti meyipbaji tang mapang ya lir," ta Davis-i metetdaksü.

Iba senden nungji Dallas nung aliba First Baptist Church nung pastor, Rev. Robert Jeffress-ia jembia liasü. Pai Arogo nung lenirtem dang tasü aittsü ajungshi.

Pastor Robert-i, "Tang Tsüngremi asenok nem teinyaktsü mapa agüja alibaji, alima raksaba menodaktsütsü atema temenen nokdangtsü asoshi lir. Kechiba? Khrista osangtajung proktsü atema ano mapang talangba alangzüktsü asoshi lir. Khristantemi temenen menokdangtetra kechi ataloktsü?. Küm 83 tejaklen Khristantem ola madoki aliba mapang nung Adolf Hitler merena liasü, iba amaji ataloktsü," ta metetdaksü.

Iba senden nung okila jembidang taoba mapang U.S. Secretary of State, Mike Pompeo-i, tamang manokshitsüji tongtibangba, ta ashi.

Pompeo-i, "Khristan ka ama ni USA nung 70buba Secretary of State liasü, aser iba wadang shidak inyakba ajanga yimjung liasü," ta ashi.

Dr. James Davis-i, Kibubai tenyaba wadang tulutiba renemtsü atema alu nung inyakertem aika nüngdaker, ta ashi.

Paisa, "Yisu Khristai, alu mena lir saka alu nung inyakertem nübo ishika dang ta ashi. Asenoki Khrista osangtajung sayutsüngiba aser Arogo tasen tentettsüba nung mapang tali indoktsüla. Iba mangdangji yur onoki 2030 küm tashi nungbo minister tasen million ka training agüja yaritsü tebilemba lir," ta metetdaksü.

Asentenshi milak jangrutsü mapang ana nung ali asü aser Arogo renema ali asü?, ta asüngdangba langzüdang Davis-i, "Alu tulu aruhtsü nüngdak anungji tanga rong-a ajatsüsa akümer. Iba ya ango timtem masü saka rong timtem lir. Asenok renema alitsüla, kechiyong Kibubai asentenshi milak yoktsü. Ajisüaka iba atemaji asenok renema alitsüla. Ano ita trok mesüra küm trok lir ta ashitsü menüngdak. Tsüngremi mapa inyakdar aser Pai tesem ajaklen mapa inyakdar. Iba atema asenok renema alitsüji tongtibang," ta metetdaksü.

ANO GO ABEN TSÜNGREM DEN

TAKÜM ALIBA
TAJANGZÜK

Kechiyong tang nenoki Kibuba nung akang akanga noktakra onok taküm alibaji tajangzük kar.

~ 1 *Tesalonika 3:8*

Iba lima nung tatsüka alidang kanga dang tangatetba tajung bener shisakaa alitsüji kanga dang tongtipang. Tamajung tasa aika bener ken jangratema alibaji tajangzük akaba taküm ta kodanga majar, saka iba dangjibo shisa maka taküm ta ajar. Iba lenmangji alima nung aika dang lir, saka ken jangratem aser ken atema tajangzük bushia inyakra ibaji amongtema malitsü. Na aser ni iba lima nung yutsüba ya tajung aser tagizüktettsüba lenmang nung jajaa tajangzük agütsütetba taküm ka asütsü Tsüngremi pa nükjidong tulu nung yanglu.

Tia tensa ajak nung Kibuba nung akanga noktaktetba taküm kaka asütsü pai akhanger. Alima ya kangasa tebenja aser teraksa agi sünga lir, anungji indang-indanga alitsü, inyaktsübaji tasak. Saka tatishitsü tajung sayua pa dak amangtsüba, chirnur aser semchir semnurtem nem lemoatsü senmang tajung aser tsüngsü tajung doktsütsü asoshi asen taküm ya iba lima nung doktsü. Anungji, taküm shiai jungjunga shisadanga Tsüngrem akümtsübua pa metetba nung tera yanga Tsüngrem aser alima asoshi lajangzük agütsütetba taküm, temoatsü abenba taküm ka ka sütettsüsa Tsüngrem dak akang-akanga amangdi. Amen.

India nung Arogo lenirtemi film ka nokdangtsü akhang



February 08, 2025: India tesem ajaklen Khristan putirtemi film ka anema longkak ait; iba film ji ajanga Khristan yimsü mezüngmeshir, ta parnoki metetdaksü.

Küm aika jakdang Australia nunger missionary, Graham Staines den par jabaso ana gari telung nung rongseta südaksüba state, Odisha nung February 7, 2025 nü 'Sanatani-Karma hi Dharma' sayaogo. Iba film ya Odia oshi nung tangok.

Khristantem dang masü secular teloktemia iba film sayaba nokdangang, ta takhangba agüja liasü, ajisüaka iba film sayaogo.

National United Christian Forum-i sangdong ka ajanga, "Iba film ajanga tamangba yimsü meyipbaji ozüing alema inyakba mapa ka ama sayur. Iba film ajanga tamangba yimsü temeden ilatsür," ta metetdaksü.

Catholic, Protestant, Orthodox aser Evangelical putirtemia iba film ajanga Khristan tesayuba tongtibang aika raksatsür, ta metetdaksü.

Khristan putirtemi, "Iba film ji tribal yimtsüngtem nung tangok, aser iba film ajanga tribal nüburtem tsüngda telemsa adokdaktsütsü," ta metetdaksü.

Iba film otsüji Odisha state kübok tribal yimtsüngtem nung Khristan yimsü dangi meyipba aser arasenba mapa inyakba indang lir.

Film nüngja 'Sanatani' ya Sanskrit oshi lir, aser iba tetezü Hindu yimsü amangertem lir. Item ama nisungtem atema Karma hi Dharma tetezüji mapa inyakbaji yimsü lir.

Odisha state nung tesüiba mapangtem nunga Khristantem anema inyakba tatalokba aika liasü. 2008 küm nunga Odisha state kübok tribal nütsüng aika aliba Kandhamal district nung Hindu nungertemi Khristan ki aika

rongdoktsüba den Tenla kitem rongdoktsü aser Khristantem teimba ser nisung 100 shi tepseta liasü.

Iba state nung Hindu teloktemi Hindu nunger tekolak asütsü meranger aser Khristan missionary tem mapa anema nokdaker.

Hindu teloktemi, tribal nütsüng aser sensakertem aliba tesemtem nung Khristan missionary temi aika Khristan yimsü dangi meyipdaksür, ta tai tongloktür.

Tribal nütsüng aika aliba Kandhamal district nung nütsüng 750,000 lir aser iba nungjagi nütsüng shilem 20 shibo Khristantem lir.

Khristan putirtemi, Odisha nung tribal nütsüngtemi sobaliba balala benshir, külem-küja balala aser yimsü balala amangner, anungji iba film ajanga nütsüngtem rongnung telemsa adokdaktsütsü, ta metetdaksü.

"Parnok rongnung telemsa adokdaktsütsü merangbaji tribal nisungtem indang ali, tzü aser arem temeden jenjang raksatsütsü atema lir. Odisha nung Khristantem anema inyakba tatalokbatem asenoki bilemtettsüla," ta parnokisa metetdaksü.

Kandhamal district nung tongti putir, Manoj Kumar Nayak-i, "State tesem ajaklen iba film sayaba ajanga ozü nüburtem (Khristantem) shisabulur aser tsübur," ta metetdaksü.

Taoba hopta Kandhamal nung Khristantemia shidi ka ajanga Chief Minister, Mohan Charan Majhi dang, iba film ajanga Khristan missionary majung ama sayur, anungji iba film sayatsü alibaji nokdangang, ta mepishia liasü.

Khristantemisa Orissa High Court danga iba film nokdangang, ta temepishiba agüja liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tejaja

(v) tali jembiba, tebang telili (talkative)

* Lokti nung tejaja nisung aikati maginer.

Tejak

(n) tokolak nung tenük tebang aser teni atenlen (face)

* Aonung shia tejak meyr külenang mejangtsüla.

OLONG PAITEP # 7059

	1		2			3		4		5
6								7		
					8		9			
			10							
11										
				12						
13		14		15					16	
17								18		

TIPIEN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ___ hi
16. Akümli nungi pilar

OLONG PAITEP # 7058 TELANGZÜBA**TIPIEN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER MA

76 buba Indian Republic Day nung Ministry of Culture, Government of India-i Sangeet Natak Akademi den yaritepa 'Largest Indian Folk Variety Dance' atema Guinness World Record ka yangluogo. Jayati Jai Mamah Bharatam - 2025 sentong nung linük kübok tesem balala nungi artistes 5,000 tashi anidener folk & traditional dance forms 50 tema ia sayu.

Iba sentong nung Minister of Culture and Tourism Gajendra Singh Shekhawat; Joint Secretary Government of India Uma Nanduri aser Sangeet Natak Akademi Chairman Sandhya Purecha nunger aden.

Dibrugarh University International Literature Festival temogo**Dibrugarh, February 8, 2025**

(Agencies): Tanabuba Dibrugarh University International Literature Festival (DUILF) tanü tembangogo. Iba benjung ajanga Northeast India nung literary wadang nung tongtipang alizüng ka tongtetogo.

Iba benjung nung linük 23 nungi kakat zülur 120 shi ka aden aser central theme ji Africa liasü.

"Onoki India nunger asoshi balaka bilemer. Africa ajaklen India nunger lir" ta Guinea-Bissauan author Abdulai Sila-i ashi.

India aser Africa tsüngda sobaliba tesentaktep lir aser Dibrugarh University nung kaketshirtemi iba benjung nung Africa indang angazükba atema kanga pelar ta pai ashi.

Anogo pezünü Dibrugarh University International Literature Festival nung session 50 tashi agidang kaketshirtem aser tesayurtemi shilem tajung agiba atema tenügsang agütsür ta Sila-isa ashi.

Iba sentong ya Foundation of Culture, Arts and Literature

(FOCAL) aser Dibrugarh University külemi yaritepa ayongzük.

Yaküm benjung nung UK author Ann Morgan aden aser taküm-a la kasa benjung nung adenba atema pelaba metetdaksü.

Iba benjung ya "truly international" lir kechiyong kaketshirtemi shilem tajung agir aser tesem balala nungi kakat zülurtem adener. International literary festivals ta ajaba kar nungbo iba amai shilem magir ta lai ashi.

"University kati iba amai literature festival ka ayongba ya iba ya dang asütsü. Kaketshirtemi shilem tajung agiba atema tenügsang agütsür aser Assam sorkari 2025 ya Year of Reading ta sangoktsüogo. Sorkari iba mapatong kübok kaketnang aika yarir aser FOCAL-i iba movement tejakleni bener aotsü tenangzükba lir, ta FOCAL trustee aser Principal Secretary to the Government of Assam Kalyan Chakravarthy-ia ashi.

University-i iba benjung takok ngua amongtsü atema

meranger aser ainertem anisüngzükdaksür. University-i international students 40 dendaksü aser parnok teimba ka African linüktem nungi lir ta Dibrugarh University nung Prof. Surajit Borkotokey-i ashi.

Benjung tembangba sentong nung FOCAL trustees- Chakravarthy, Padma Bhushan awardee filmmaker Jahnu Baruah, retired IAS officer VB Pyarelal, noted author Dhruva Hazarika, Dibrugarh University Registrar Paramananda Sonowal, aser festival chief coordinator Rahul Jain nungeri kakat zülurtem nem tetushi agüja liasü.

"DUILF 2025 ya imlaba dang nungi tajungba mongtetogo aser Northeast India o alima tsüngda literary dialogue adokdaksüogo. Iba benjung ajanga global literary map nung Dibrugarh University densemba dang masü saka regional literature ajungketba den international cultural exchange tajungba kümdaksüogo" ta Dibrugarh University Vice-Chancellor Jiten Hazarika-ia ashi.

Manipur University-i value added course ama NSS benokogo**Imphal, February 8, 2025**

(Agencies): Manipur University indang syllabus nung National Social Service (NSS) ya "Value Added Course" (VAC) ka ama densemogo ta Manipur University (MU) Vice-Chancellor Prof N Lokendra Singh-i ashi.

Swachhata Programme kübok NSS orientation program ka

agidang Vice-Chancellor Prof. Lokendra-i iba osang metetdaksü.

"VAC dendaksüba ajanga kaketshirtemi parnok academic curriculum den külemi NSS shimtsü akok aser iba ajanga practical experience aser social awareness angazüktsü" ta Prof. Lokendra-i ashi.

Swachhata Programme kübok NSS volunteers-i

cleanliness drives, awareness campaigns, aser hygiene & sanitation ajungketba mapatem inyaksü ta paisa ashi.

"Swachhata Hi Seva" kübok public tesemtem merükmejutsü, rally tem ayongzüksü aser nübortem dang waste management indang tesayubatem agütsütsü ta Prof. Lokendra-isa ashi.

Bangkok nung Meghalaya nunger ka samar bushiteper**Shillong, February 8, 2025**

(Agencies): Meghalaya nunger arishi küm 57 tain tambur ka Bangkok, Thailand nung samar bushiteper.

Iba nisung ya Treatchell Lyodum Lyndem ta jangjaogo aser pa ya January 5, 2025 nungi samar bushitepa arur.

Pa bushitepa aruaka police-i tang tashi pa kolen lir osang kecha memeteter. East Khasi Hills Police-i Crime Investigation Department (CID) dang Interpol India den yariteptsü shiogo ta ketdangsür kati ashi.



East Khasi Hills Police-isa Thai ketdangsürtem den külemi samaba nisung bushitsü atema Yellow Notice ka agütsütsü mepishiogo.

Lyndem ya Khasi Hills Autonomous District Council

(KHADC) nung ketdangsür ka lir aser pa tatemsabuba angubaji January 5 anepdang 2:00 ako meta NH Bangkok Sukhumvit Boulevard 2 indang lobby adena süiba lir.

Pa January 3 nü medemer asem den külemi Bangkok-i ao. Lyndem kinungtsü-i missing person complaint ka agütsü aser Lumpini Police Station, Bangkok nung FIR ka benokogo.

Indian Embassy nem iba osang sangoktsüogo aser Thai police o embassy ketdangsürtemi Lyndem bushitepa arur.

Hamas aser Israel na tepuoker pongubenbuba melentepogo

Gaza City, Tsüklai/February 8 (Agencies): Hamas puri Gaza nung pur yua aliba Israel nunger asem chiokogo, aser iba melena Israel-ia Palestine nunger tepuoker 183 chiokjtsü atadar.

Tepuokertem ya Honibar anepdang International Committee of the Red Cross nem bendanga agütsüogo. Gaza ceasefire tenangzüktepba kübok tang agi pongubenbuba tepuokertem melentepogo, ajisüaka United States tir Donald Trump-i Palestine nungertem iba tesem nungi tashiyim agi agintsü asoshi benokba sülen tenangzüktepba yaglur aliba ya anakshiogo.

Hamas puri chiokba civilian asem ya Eli Sharabi, 52, Levy, 34 aser Ohad Ben Ami, 56 nunger lir. Parnok asem ya tenangzüktepba mezüngbuba shilem kübok chiokogo, koba March ita tashi benoka atatsü.

Tepuokertem bendanga magütsü tsüngda parnok ya central Gaza, kübok Deir el-Balah tesem nung yanglur aliba sabang ka nung parnok chiokba kuli kaket bener nokdak. Parnok ya Qassam Brigades sepaitemi longbanger liasü.

Al Jazeera osangbener Tareq Abu Azzoum-i ashiba agi, sentepa aliba lokti-i Hamas indang military wing Qassam Brigades pusema ola adoka liasü.

Sharabi aser Ben Ami naprongla ya Hamas puri October 7 nü Kibbutz Be'eri amakba mapang pur oa liasü. Iba anogo Hamas puri nisung 1,200 tepset aser nisung 250 pur oa liasü. Kasa mapang nung Levy ya Nova music festival nungi pur ao.

Amman, Jordan nung Al Jazeera osangbener Hamdah Salhut-i ashiba agi, tepuokertem rognung mezüngbuba shibai Hebrew oshi agi jembia liasü, pai Israel sorkar dang iba tenangzüktepba kübok tanabuba aser tasembuba shilem naprongla benoka inyaksü ayongzüka liasü. "Israel nungertem timbakatia iba ya aginer," ta lai ashi.

Tel Aviv kübok Hostage Square nung Israel nungertema yongyatepa atatepdar, ta laisa shisem. "Iba tesem ya tepuoker kinungertem aser Israel nunger atema kanga tonagtibang tesem ka kümogo, shirnoki tepuokertem chiokdaksütsü aser Ato Kilonser Benjamin Netanyahu nongshitsü atema longkak aita arudar," ta Salhut-i ashi.

Kasa anogo Israel-i chioktsü aliba Palestine nungertem rongnung 183 rongnung arishi küm 20 nungi 61 tsüngda aliba Hamas pur lenir tejentem densema lir. Parnok rongnung tenetbo Egypt-i yoktsü.

Chioktsü alirtem rongnung Iyad Abu Shakhdam densema lir, shiba küm 21 shi tepuokdak yua lir. Pa ya 2000 tetenzüklen Palestinian uprising mapang Hamas puri Israel amakba nung densema liasü.

Ano chioktsü pur rongnung Jamal al-Tawil densema lir, shiba occupied West Bank nung yimden yimsüsür aser Ramallah anasa el-Bireh yimtsüng nung taoba mapang Mayor liasü. Pa küm 20 shi Israel nungeri puli chiokli ta arudar.

2021 küm apuba sülen al-Tawil ya administrative detention nung yua liasü.

Kasa mapang nung Israel nunger sepaitemi manger mesangwa tsüngda occupied West Bank nung parnok chioktsü aliba Palestine nunger kitem meitaogo.

Palestinian Information Center-i ashiba agi, Ramallah northwest len amenoka aliba Deir Nidham yimtsüng nung kitem meitaogo aser Qalqilya yimti nung alir aika purogo.

Ceasefire atema nangzüktepba kübok mezüngbuba shilem nung anogo 42 lateter aliba mapang Israel nunger 33 aser Palestine nunger tepuoker 2000 chioktsü lemteter aliba ama benoka inyaka arudar. Trump-i Gaza azüngteta iba litsü atsüngtsü atema benokaba ajanga nüburtemi ola adokaka tang

tashi nungbo inyakyim nung tetsükdaksü madoki arudar.

Tang tashi nung Israel nunger 18 aser Palestine nunger 550 melentepogo. Ajisüaka Trump sentong ajanga sensaksem tanabuba shilem aser Hamas puri tepuokertem ajak chioktsü aliba tasaktiba shilem benjatsütsü akok.

Israel aser US nati iba tesem merektettsü atema jenjang agira parnok asoshi ken o sensaksemtsü atema tepuokertem dak dang metaloktettsü anungji tensa mejungra parnok i tepuoker tanungbatem mechiochtsü.

Sensaksem tasembuba shilem nung Gaza yanglushitsü asoshi beoka lir, saka US nunger ketdangsürtemi iba dak sendakba nung ken o mejangjai jembidar.

Ceasefire mezüngbuba shilem nung Palestine nungertem northern Gaza-i meyipa aotsü aser iba tesemi humanitarian teyari talila yoktsüba-a densema lir. Taoba hopta yirur aliba Palestine nungertem Egypt-i aotsü atema temelaba agütsüogo.

2023 küm November ita hopta ka atema ceasefire benokba mapang Hamas puri pur or aliba tepuoker 100 dak tema chioka liasü. Tepuoker 70 dak tema Gaza nung lir, saka parnok ya aika sür alitsü ta bilemer.

Israel aser Hamas na sensaksem tanabuba shilem tenangzüktepba meyanglushitetra March ita nungibo ano rara tenzükshitsü akok ta tsübua bilemer.

Baltics state tem Russian power grid nungi atsünginer

Vilnius, Tsüklai/February 8 (Agencies): Europe indang system nung adentsü atema Baltic states temi Honibarnü Russia indang power grid nungi atsünginogo. Moscow-i Ukraine amak Atenzükba sülen küm ka shi jenjang agia aruba sülen tang parnoki Russia den tesendaktep mayutsü telemtetba agiogo.

Taoba mapang Soviet republics Estonia, Latvia aser Lithuania nunger ajak dang European Union aser NATO nung densema lir aser parnoki Moscow nem power grid ya hadir ka ama parnok anema mamshidaktsü atema Russia indang grid toktsüogo.

"Russia-i electricity system ya geopolitical blackmail hadir ka ama amshitsü tashi aliba onoki tang ainger," ta Lithuania indang Energy Minister Zygimantas Vaiciunas-i AFP dang ashi.

Taoba Estonia PM aser EU foreign policy tekolakba Kaja Kallas-i iba jenjang agiba atema X ajanga tenüngsang agütsüogo aser ashiba agi iba ya nüjiso aser Europe telongjem asoshi takoka.

Baltic linük asem rongnung Lithuania-i tama Moscow-i azüoker aliba electricity network nungi atsüngina liasü, ta Lithuania indang grid operator Litgrid-i Honibarnü ashi.

"Kaliningrad aser Belarus den Lithuania indang electricity exchange lines 07:43 local time nung disconnect asüba metetdaksür," ta Litgrid otongdar Matas Noreika-i AFP

dang ashi.

Baltics linüktemi European grid den longjemtsü atema mapang talangka renema aruogo, saka technology aser senotsü nung tetsükdaksü adokba ajanga timtema aruogo.

Ajisüaka Russia-i 2022 küm nungi Ukraine amak tenzükba sülen iba ken o ya kanga tongtiba aküm aser Baltic state temi parnoka amaktsü akok ta bilem tenzük.

Iba sülen parnoki Russia indang gas aser electricity aliba anen saka power grid ya Russia aser Belarus den maneni sendaktepa liasü.

Iba ajanga parnok electricity asoshi Moscow dak metaloker liasü, koba factory aser power supply tajung nüngdakba facility tem atema kanga tongtibang liasü.

Russia indang grid nungi atsünginba sülen Baltic state tem parnok indang frequency, mesüra power level asadangtsü atema ghonda 24 "isolated mode" nung inyaksangshitsü.

Iba sülen Poland ajanga European power grid den sendaktepsü.

"Kinetic operations against critical infrastructure, cyber-attacks aser disinformation campaigns amala tetsükdaksütem ajangshitsü akok," ta Lithuania indang state security department-i ashi.

Poland indang power grid operator PSE-i ashiba agi, parnoki Lithuania den connection patrol asütsü atema helicopter aser drone tem amshitsü.

FORM- G

JAIPRAKASH ASSOCIATES LIMITED

ATEMA TEJANGRARTEN JAKOKER

(Insolvency and Bankruptcy Board of India (Insolvency Resolution Process for Corporate Persons) Regulations, 2016) ("CIRP Regulations") kübok Regulation 36A nung)

10th January 2025 nü sayaba Form G indang amendment ya teküboklen agüja aliba leniri sangdongogo koba February 4, 2025 nü senden amenba mapang Jaiprakash Associates Limited ("CD") indang committee of creditors ("CoC") nem temzüng özüng dak ajemdaker agizüchtsü atema benokogo.

RELEVANT PARTICULARS	
1. Name of the corporate debtor along with PAN & CIN/ LLP No.	Jaiprakash Associates Limited PAN: AABCB1562A CIN : L14106UP1995PLC019017
2. Address of the registered office	Sector 128, NOIDA 201304 (Uttar Pradesh)
3. URL of website	http://jalindia.com/index.html
4. Details of place where majority of fixed assets are located	The business of the CD is diversified and the assets are located across India and certain overseas locations. For more details, please refer to the website above.
5. Installed capacity of main products / services	The CD is a conglomerate with diversified business interests including Real Estate, Engineering & Construction, Cement, and Hospitality. Please refer to the website above.
6. Quantity and value of main products / services sold in last financial year	The investment teaser containing the details about the CD is available at: http://jalindia.com/cirp.html
7. Number of employees / workmen	Further details of the process and manner of submitting an expression of interest in the corporate insolvency resolution process ("CIRP") of the CD, including the eligibility criteria for prospective resolution applicants (as approved by the CoC under Section 25(2)(h) of the Insolvency and Bankruptcy Code, 2016 ("Code"), are set out in the detailed Invitation for Expression of Interest.
8. Further details including last available financial statements (with schedules) of two years, lists of creditors are available at URL:	The detailed Invitation for Expression of Interest containing these details, is available on the website of the CD and can be accessed at http://jalindia.com/cirp.html .
9. Eligibility for resolution applicants under section 25(2)(h) of the Code is available at URL:	
10. Last date for receipt of expression of interest	11th March 2025 - earlier date was 9 th February 2025
11. Date of issue of provisional list of prospective resolution applicants	21st March 2025 - earlier date was 19 th February 2025
12. Last date for submission of objections to provisional list	26th March 2025 - earlier date was 24 th February 2025
13. Date of issue of final list of prospective resolution applicants	5th April 2025 - earlier date was 6 th March 2025
14. Date of issue of information memorandum, evaluation matrix and request for resolution plans to prospective resolution applicants	10th April 2025 - earlier date was 11 th March 2025
15. Last date for submission of resolution plans	9th June 2025 - earlier date was 25 th April 2025
16. Process email ID to submit Expression of Interest	cirpjal@gmail.com
17. Details of the corporate debtor's registration status as MSME	NA

NOTE - 1. Idaki shisema aliba ama mapanglem ya (i) yanglushitsü akok mesüra atsülingtsü akok (CoC temelaba dak ajemdaker); aser CIRP Regulations den Code read kübok CD indang CIRP tembangtsü atema mapanglem atsülangtsü/ intokba ajak, kong Hon'ble NCLT in IA No. 21/2025 (koba tang sub-judice nung lir) CD indang CIRP mapang from/ extension tapet intokba indang grant densema lir aser CD indang CIRP mapang atsülangtsü atema application koba Code kübok Section 12(2) dak ajemdaker teküboklen agüja aliba ketdangsüri file sütettsü aser iba y atsülangtsü asoshi CoC. 2.-i agizükogo Form G ya Expression of Interest indang detailed Invitation nung terms, conditions, aser disclaimers den sendaktepa azüngtsüla, koba Form G nung shilem ka asütsü.

Sd/-
Bhuvan Madan
IBBI/IPA-001/IP-P01004/2017-2018/11655
Registered Address: A-103 Ashok Vihar Phase-3 (Behind Laxmi Bai College),
New Delhi, National Capital Territory of Delhi - 110052
(9th February 2025, Noida)
For Jaiprakash Associates Limited

ALI TAYOKTSÜ LIR

1. Old Showuba nung, 12397 Sqft. Four lane, fly over anasa.

2. Rs. 50 per Sqft. Aginüba tasazük angutsü.

3. (5 Pura) 1 Pura - 3,200,000/- Contact : 9863826159.

ALI AYOKER

AO YIM NUNG

(OLD SHOWUBA ANASA)

13, 000 Sqft @ 280 / Sqft.

CONTACT : 8414098824

SUPREME COURT OF INDIA

RECRUITMENT OF JUNIOR COURT ASSISTANT

Online applications from eligible candidates are invited for the post of Junior Court Assistant (Group 'B', Non-Gazetted Post) placed in Level 6 of Pay Matrix with Initial Basic Pay of **Rs. 35,400/-**. The approximate Gross Salary as per existing rate of allowance including HRA comes to **Rs. 72,040/-** per month (pre-revised pay scale PB-2 with Grade Pay of **Rs. 4200/-**). The details about eligibility conditions etc. can be downloaded from Supreme Court Website www.sci.gov.in.

Sd-
Place: New Delhi
Dated: 04.02.2025

(Mashroor Alam Khan)
Registrar (Recruitment)

Sasikumar, Karan nem wild card agütsü



Mukund
Sasikumar



Karan
Singh

Tsüklai/February 8, 2025

(Agencies): 2025 Delhi Open nung taoba mapang World No. 31 Lloyd Harris aser 2019 Wimbledon Boys' Singles champion Shintaro Mochizuki na top 8 seed asayar rongnung densema lir.

Iba ATP Challenger 75 event pongububa ya DLTA Complex nung February 10 nungi 16 tashi asayatsü.

Togo den Davis Cup World Group I Playoff asaya 4-0 akokba India team nung densema aliba asayar Mukund Sasikumar, Ramkumar Ramanathan aser Karan Singh nung nem iba asayamung atema wild card agütsüogo.

Iba asayamung kija asaya nung asaya 32 asayatsü, kong asayar 21 indang idanga asayatsü, wild card asem nem

agütsüsü, qualifier trok alitsü aser special exempts ana alitsü.

South Africa nung asayar Harris, shibai Rafael Nadal dena kokogo, pa seed pezübuba asütsü aser Japan nungi arishi küm 21 tain Mochizuki seed trokbuba asütsü.

Czech Republic nungi Vit Kopriya top seed asütsü aser pa ATP Challenger titles trokbuba akoktsü nükjidong nung asayadar. Tanabuba aser tasembuba seed asayarji United Kingdom nungi Billy Harris aser Australia nungi Tristan Schoolkate na asütsü. Schoolkate-i taoba hopta Queensland International koka Brisbane nung Challenger title tanabuba benogo.

"Iba asayamung ya asayar tejen aser lanur asayartem

atema temaba jenjang nung parnok tendangtsü aoshi sabang tajung ka asütsü," ta DLTA tir aser India indang non-playing Davis Cup captain Rohit Rajpal-i ashi.

India nung asayar Aditya Govila, Chirag Duhan, Sidhart Rawat, aser Aryan Shah nung qualifying stage atema wild card nguogo, kong parnok asayar tejentew menden taziung trok aliba atema tokteptsü. Duhan aser Shah na India indang Davis Cup squad nung densema liasü.

France nung asayar Geoffrey Blancaneaux-i 2024 küm Delhi Open final nung Hong Kong nung asayar Coleman Wong 6-4, 6-2 agi koka liasü, saka pai pa indang title defend masütsü telemtetba agiogo.

Nathan-i wicket 550 agiogo

Tsüklai/February 8, 2025

(Agencies): Australia nung off-spinner Nathan Lyon-i Sri Lanka den tang asaya aliba tanabuba Test nung wicket 550 agia par team nem teyari tulu agütsüogo aser takok angütsü ana nung lir.

Tanabuba Test asaya tasemnübuba Australia team-i asayar asem out sür run 330 yanglur lia tenzüker aser parnok run 414 yanglur asayar ajak out süatok. Parnok rongnungi Alex Carey-i run 156 aser Steve Smith-i run 131 yanglua liasü.

Sri Lanka nung bowler tem rongnungi Prabath Jayasuriya-i run 151 agütsür wicket 5 agia liasü. Mezüngbuba innings tembangba sülen Australia run 157 agi tejakdang liasü.

Ajisüaka Sri Lanka team-i tanabuba innings junga metenzüktet aser Matthew Kuhnemann-i Dimuth Karunaratne densema opener anaprongla out sütsü.

Karunaratne atema iba asaya ya tatembangbuba asaya liasü, kecyiong pa asaya nungi anisüngzüksü telemtetba agiogo. Tanabuba innings nung pai run 14 yanglua liasü.

Mapang tatsüka dang lir Lyon-i Chandimal out sütsüba sülen pai Test asaya nung wicket 550buba agi aser Sri Lanka team jenjang mejungi kümdaktsü, kechiyong asayar asembuba out asüba mapang tashi nung parnok run 39 dang yanglur liasü.

Arishi küm 37 tain asayar shiba 2011 küm Galle nung mezüngbuba asaya-a Test career tenzüker, pa ya Shane Warne (708) aser Glenn McGrath (563) na sülen iba alizüing tongtetba Australia nung asayar tasembuba kümogo.

Sri Lanka atema Angelo Mathews-i kanga ajanga ajanga nokdak, ajisüaka pa-a run 76 yanglur aliba mapang Lyon-i out süja liasü.

Tasemnübuba asaya tembangba mapang tashi nung SL team-i asayar 8 out sür run 211 yanglur liasü. Parnok rongnungi Kusal Mendis-i out mesüi run 48 yanglur lir. Tanabuba-innings nung wicket ana anunga lia SL team run 54 agi tejakdang lir.

Sri Lanka aser Australia na asayamung nung mezüngbuba Test Australia koka parnok 1-0 agi tejakdang lir.

Reliance Foundation Athletes temi kanga junga asayadar

Tsüklai/February 8, 2025

(Agencies): National Games tenzüker mezüngbuba anogo 10 tsüingda Reliance Foundation indang athletes temi kanga junga asaya-a medal 14 nguogo. Asayartemi gold pongu, silver pongu aser bronze medal pezü nguogo.

Medal tem ya shooting, archery, badminton aser boxing asaya nung nguua liasü.

Reliance Foundation-isa, parnok asayartem atema recovery centre ka amenoktsüogo, iba ajanga parnok tajungtiba asayatetsü atema teyari agütsüsü.

Tokyo medalist Lovlina Borgohain-i maneni kanga junga asaya-a tetsür boxing 75kg category nung gold medal nguogo.

Shooter tejen Gurpreet Singh-ia, 25m rapid fire pistol nung silver aser 10m air pistol category nung bronze medal nguogo. Pa den külemi Reliance

Foundation athlete-sa Ravinder Singh-ia 10m air pistol event nung silver medal nguua liasü.

50m rifle 3 positions asaya nung Niraj Kumar-i asayar tajung aika ajateta gold medal angu aser tetsür 10m air pistol event nung Palak Gulia-ia kanga junga asaya-a silver medal nguogo.

Badminton asayar Unnati Hooda, shibai Haryana tetsür team-i tetsür team championship akokba nung tongtibang shilem agia liasü, lai tetsür kija asaya nung silver medal ka nguua liasü.

Archery nung sempet tajung aketba lanur asayar Goldie Mishra-i medal ana nguogo. Pai tebur recurve team event nung gold medal aser recurve mixed team event nung bronze medal nguogo. Tebur recurve individual event nung Juyel Sarkar-i asayar tajungtem aika tsükdakja gold medal nguogo.

Marcelo football asaya nungi anisüngzüker

Tsüklai/February 8, 2025

(Agencies): Taoba mapang Real Madrid aser Brazil team nung defender Marcelo-i arishi küm 36buba nung pa asaya nungi anisüngzüksü sangdongogo.

Marcelo 2007 nungi 2022 küm tashi Real Madrid nungi asaya aser iba mapang pai takok marok 25 koka liasü. Takoktem rongnung Champions League pongu, La Liga championships trok, Copa del Rey ana, Spanish Super Cups pongu, FIFA Club World Cups pezü aser UEFA Super Cups asem densema lir.

2022 küm Marcelo lenisüba nung Real Madrid puri Champions League 14buba koka liasü. Iba küm final nung parnok Liverpool goal 1-0 agi koka liasü. Pa dak attack asütsü tashi aliba, dribbling kanga junga sütetba aser lenir kanga tajung asüba ajanga pa Santiago Bernabeu nung ajaki saklokba asayar ka liasü. Pa iba club nungi 546



ben asayaogo.

Madrid nung asayaba indang bilemteta jembiba mapang Marcelo-i, "arishi küm 18 asüba mapang Real Madrid-i bushia aru aser ni idaki aru. Ni ya chichiba 'Madrileno' ta shitettsü. Season 16, title 25, UCLA 5, captain rongnung ka aser Bernabeu nung aonung tajung aika ajangshiogo. Real Madrid ya khenyongi club balaka.

"Asayar ka ama kü mapang idaki tembanger, saka football atema agütsüsü asoshi aika anunga lir. Ajak atema kanga pelar," ta pai ashi.

International jenjang nung Marcelo kanga takok nguua asayaogo aser pa Brazil tenüing nungi 58ben asaya liasü. Marcelo-i linük team nungi 2013 FIFA Confederations Cup, 2012 Olympic Games nung silver medal aser 2008 Olympic Games nung bronze medal kokogo.

2022 küm Madrid toktsüba sülen Marcelo Greece nung Olympiacos nung mapang tatsüka asaya aser iba sülen Fluminense-i meyipa ao, kong pa career tenzüka liasü. Pa kidangi meyipa aoba sülen 2023 küm Fluminense puri 2023 Copa Libertadores koka liasü.

Ajisüaka tanabuba season nungbo pa asaya 2024 küm November ita anena liasü. Gremio den asayaba mapang head coach Mano Menezes den asatapa sülen pa asaya nungi anena liasü. Club den sensaksemba sülen Marcelo-i club toktsü aser tang asaya nungi anisüngzüker.

BILEMDANGANG

"Ajemalurtemi moa kechiyong parnok alima senmang amangtsü."